


柳田文庫  
文庫11  
D 124  
5





莊靖先生遺集卷之七

樂府

洞僊歌 謝揚成之寄梅

六十四

隴頭瀟灑辜負尋芳眼浪蕊浮花問名懶縱看看驛  
使帶得春來祇恐怕綠葉成陰子滿暗香無恙否月  
落參橫惆悵羅浮夢魂短賴故人情重不減西湖花  
一月分我黃昏一半更選甚南枝與北枝是一種春  
風待爭寒煖

又 汴梁與許道真郭伯誠劉光甫同賦

百年富貴一覺邯鄲夢識破中流退應勇縱生前身

文庫 11  
D 124  
5



後得箇虛名褒貶處一字由他南董故園歸去好還  
肯同歸大廈如今有梁棟對青天咫尺列宿森然君  
莫惟不見少微星動且拂袖林泉作詩人盡明月清  
風笑人嘲弄

又 中秋

秋光海底湧出銀盤爛只怕微雲淡河漢料姮娥應  
笑醉舞仙人今夜裏空恁樽前撩亂尋常三五夜也  
有團圓爭柰人心未能滿記當初破鏡飛上天時雙  
照影留得人間一半待仗他玉斧再修成問明月明  
年共誰同看

瑞鶴僊 細君壽日

蕭然林下秀笑簷外梅花似人清瘦東風在垂柳算  
幾時吹散眉間春皺興來搔首問今朝何處有酒怕  
一場醉後漁歌樵唱大家拍手知否眼前合計無辱  
無榮地久天長不須肘後望懸他金印如斗待一朝  
隨我騎鯨去後共尋天上王母把碧桃花底流霞爲  
君添壽

又 弟李經畧生朝

曉窗寒氣悄問小槽滴後真珠多少博山壽煙裊向  
百花頭上梅花開了金樽頻倒甚坐閒猶恨盃小記

去年今日大家同慶太平佳兆堪笑浮雲世事流水  
生涯南柯夢覺風光正好欲退時何似聞早把俗緣  
拋盡逍遙林下青松長伴難老與鶴鳴立箇家風作  
千年調

又

綿綿仙種李有大道家風逍遙活計長庚見苗裔問  
如何謫在落花浮世麴生風味爲喚回席上和氣被  
誰人說破黃梁夢裏一場富貴何濟不如歸去樂取  
閑身登山臨水衆人皆醉笑獨醒澤畔憔悴但從今  
管甚雲翻雨覆暫教心上無事且一杯盡後一杯滿

百千歲

又

沁南守劉巨源誕節十月十五

人生爲郡樂推拯俗仁懷濟時英略和風散蓮幕把  
功名一事暫宜高閣興來自酌要酒澆胸次磊落比  
月中玉兔別有長生安心是藥休錯早還識破一夢  
南柯宦情漸薄北山素約試回首千岩萬壑况竹林  
當日七賢遊處物外驂鸞駕鶴在爛柯局畔樵人看  
君下著

又

錦堂壽日壬寅十一月十五

河東賢太守使草木生光太行增秀功名落誰後醉

歸來馬上氣衝牛斗一陽應候看春風先到細柳笑  
座中有客侯輕萬戶詩誇千首依舊桂花盈處莫葉  
圓時爲君添壽滿堂飲酒盡平生傾蓋素友對水雲  
鄉裏真山面目錢家誇甚錦繡但年年歲歲相逢似  
人耐久

醉江月

壬午中秋與楊外郎仲朋姪壻郭仲  
進姪謙甫福昌待月

中庭待月正催詩雨過暮山橫碧別後連昌秋幾度  
一話團圓今夕萬里清風坐中爲我掃盡雲蹤跡冷  
光不似尋常些小窺隙應笑白髮功名倚樓看鏡惟  
酒禁愁得且鬪樽前身見在疊疊風生談席洛下仙  
舟斗間星使邂逅非生客天涯雙桂廣寒誰念幽寂  
又 六月十四日感舊先生誕日

臞仙風格暫天教作箇人間浮客白髮光陰催老境  
誰見摩挲銅狄揮劍成河曳戈却日著盡回天力黃  
梁夢覺轉頭一段陳跡休問花謝花開春蘭秋菊總  
被風欺得華表鶴來人換世惟有眼前山色儂徑栽  
松傍門插柳笑比陶彭澤晚涼月下一樽聊永今夕

又

承濟之和復用元韻

脫巾挂壁向雀羅門外幾回迎客縱有一樽陶寫後

不遇當年儀狄未著祖鞭先投班筆老恨無才力天  
涯地角斷蓬流落蹤跡歸去作箇閑人錦囊詩句都  
向閑中得謾說他鄉光景好多少世情風色損友違  
三益朋近五易卦占山澤人間星聚不知天上何夕

又 王懷州壽日丁酉年

堂堂玉立看坐間揮塵風生談席相對竹林三四友  
氣壓蘭亭豪逸招隱詩中登樓賦內此恨無人識缺  
壺歌後佩刀還向誰得何用三窟謀身醉鄉一笑與  
元規塵隔好在輞川堪畫處寫出高人椽筆雲外鳥  
鳧月邊笙鶴邂逅騎鯨白蟠桃會上不爲王母生客

摸魚兒 送姪謙甫出山

這光景能銷幾度大都數十寒暑結廬人在山深處  
萬壑千巖風雨朝復暮甚不管堂堂背我青春去高  
情自許似野鶴孤雲江鷗遠水比興有誰阻功名事  
休歎儒冠多誤藪顛彭蹶無數一溪隔斷桃源路只  
有人家鷄黍歌且舞更不住醉中時出煙霞語暫來  
樵斧貪看兩爭碁人間不道俯仰成今古

謁金門 贈教授李勉之

初雨歇槐夏綠陰時節萬里無雲天紺滑一輪光皎  
潔好怕暫高還歿好怕暫圓還缺同是廣寒宮裏客

相逢無話說

又 和邦直

煙雨曉夢斷池塘春草坐上麴生風味好銀杯休厭  
小剛要玉山醉倒社甕釀成微笑人世閑愁都占了  
有情天也老  
昏又曉蝶夢不棲芳草照映瓊林人物好薰香荀令  
小不怕醉時健倒恐怕醒時花笑潘髻都因愁白了  
老人心未老

西齋得梅數枝色香可愛一日為澤倅崔仲

明竊去感歎不已因賦謁金門十二章以

寫其懷望之懷

寄梅

開未徹先把一枝偷折看取黃昏今後別暗香浮動  
月誰為尋芳時節誤了前村踏雪為問花閒能賦客  
如何心似鐵

探梅

誰便道昨夜雪中開了次第不將消息報探芳人草  
草宜在嫩寒清曉興比孤山更好籬落逢花須醉倒  
惜花人易老

賦梅

金的燦猶帶枝頭寒色休道北人渾未識自然梅有  
格初見花時摘素再見花時狼籍詩句眼前拈不出  
惱人樓上笛

歎梅

頻點檢依舊雪肌清減似恨海東花使濫不教么鳳  
探休笑詩人冷淡道盡影疎香暗桃杏雖然無藻鑑  
承當應不敢

慰梅

誇獨不動把春光泄漏誰道江南無所有一枝先入  
十須是日就月將那在風飄雨驟直待豆楷灰落後

初嘗山店酒

賞梅

全不讓占了百花頭上歿箇知音人共賞陶潛無處  
望也有江湖酒量也有風騷詩將休道花前無伎倆  
疎狂些子放

畫梅

偷造化秀出含章簷下為問花中誰可嫁海棠開已  
罷占了十分閑雅占了十分蕭灑若使畫工能此畫  
九方皋相馬

戴梅



花譜內莫作等閑看待鬪草吳王無可對有他西子  
在好在一枝竹外影也教人堪愛未免世閒兒女態  
折來頭上戴

別梅

懷抱惡猶被暗香著莫想在隴頭誰領略一枝分付  
錯今夜雲窗霧閣明夜煙村水郭紙帳天寒人寂寞  
夢回聞雪落

望梅

春一半留與大家同看覓箇溫柔林下伴北枝猶未  
緩縱有姮娥照管可惜羅浮夢短斷嶺不能遮望眼  
幾時魂却返

憶梅

多少恨不見舊時風韻浪蕊浮花都懶問江頭春有  
信誇甚壽陽妝鏡說甚揚州詩興雲破月來堪弄影  
世閒無此景

夢梅

隨健步已過市橋江路費盡西湖多少句暗香留不  
住銷得黃昏幾度又是天寒日暮枕上吟魂無著處  
化爲蝴蝶去

又再和邦直

人未曉古錦囊中詩草抹月批風滋味好氣吞雲夢  
小要把鳳棲驚倒不學烏臺嘲笑多少閑愁陶寫了  
數篇吟可老

又 河南府同知高誠之壽

風漸力水翦飛花狼籍鼎沸笙歌催舉白玉堂金馬  
客歡動周人頌德喚起洛陽春色况值日南天道北  
老人星拱極

水龍吟 翟端甫壽日十月一日

勝遊漫說山陰算來不及山陽好七賢林下一時人  
物何如安道况有奇才縱橫筆陣千軍獨掃向碧油

幢底真儒事業倚馬看檄書草誰識平居隱操翟湯遇

江州十分禮貌世情交態雀羅門外幾人曾到且鬪

樽前等閑休問高山白早賴姮娥留得一枝丹桂伴

靈椿老為男孫哥在

又 壽堂壽日

一朝衣錦歸來高門不負于公望恍然如舊黃流萬  
里大行千丈只比當時添些氣勢減些風浪記采薇  
戍罷分茅議定凱歌動聲悲壯元自山西出將却從  
他山東入相兜鍪須待貂蟬換了凌煙畫像且把功  
名暫都分付淺斟低唱但年年看取三台長在老人

頭上

阮郎歸 戲李子搢

江南江北水連雲  
江山憔悴人華簪  
猶拂落陽塵  
離筵何太頻  
歌近耳酒盈樽  
樽前見在身  
昨朝罵坐灌  
將軍近前丞相嗔

又 楊彥明壽日壽堂之甥

年來宅相有誰承  
人誇似舅甥  
帶牛佩犢盡春耕  
菟裘了一生  
閑事業寄丹青  
筆端如有神  
試看自寫鏡  
中真老人南極星

又 郭延年誕日

斷蓬蹤跡去依劉  
試登玉粲樓  
此心安處即菟裘  
尙何來往求詩遣  
興酒消愁  
竹林多勝遊  
與君何日共  
仙舟相看應白頭

感皇恩 楊成之生朝四月初三日

嘯鳥怨春歸  
一聲聲切  
萸萸初生  
兩三葉  
征鞍何處  
撩亂楊花如雪  
鵲聲頭上喜  
來時節  
香篆半銷  
壽波重酌  
玉帶金魚坐中  
客幕天席地  
便是仙家  
日月試從今後  
數蟠桃結

又 李子搢壽日戊申年甲乙科第

甲乙占科名  
同根仙李  
富貴南柯  
夢相似  
天涯雙桂

慙愧廣寒宮裏恩恩歸去覓佳山水休話升沉休形  
愠喜且論南華養生理問君甲子少我行年一紀須  
知鄉黨禮莫如齒

又 出京門有感

忍淚出門來楊花如雪惆悵天涯人離別碧雲西畔  
舉目亂山重疊據鞍歸去也情悽切一日三秋寸腸  
千結敢向青天問明月算應無恨安用暫圓還缺願  
人長似月圓時節

滿江紅 孟州長馮巨川誕日

解慍風來天氣爽綠陰庭院多少話暫都分付畫梁  
雙燕明月欲隨人意滿十分未慙姮娥願但一年一  
度壽觴時身長健玲瓏曲低低唱玻璃盞深深勸任  
春紅吹上桃花人面簪履盡居彈鋏下煙嵐休恨平  
嵩遠待試看南極老人星今朝見

又 和張文珉

宿酒纔醒聽喚起一聲春曉無限恨滿城風絮一川  
煙草年少拋人容易去萬紅千紫都開了試但教頭  
上插花枝花應笑狂言在人絕倒狂藥盡愁難掃待  
叮嚀囑付再來青鳥團扇不堪題往事斷絃惟恨知  
音少但時時頻把鏡來看人將老

又

名利場中愁過了幾多昏曉試看取江鷗遠水野麀  
豐草世事浮雲翻覆盡此生造物安排了但芒鞋竹  
杖任蹉跎狂吟笑樽有酒同誰倒花滿徑無人掃念  
紅塵來往倦如飛鳥懶後天教閑處著坐閒人比年  
時少向太行山下覓菟裘吾將老

又

李孝先壽日四月八日

小雨初晴風搖蕩綠陰清晝見說道長庚復向人間  
鍾秀又對上番成竹筍能念贈別垂條柳看將來三  
五月圓時人如舊時東平浮世事君知否春夢斷空  
回首笑平生豪邁氣冲牛斗幽鳥自歌無譜曲飛花  
故送長生酒待騎鯨海上再相逢為君壽

又

詠雪

漠漠愁陰銀界曉浩然一色誰翦水就中撩亂燕山  
如席天若有情天也老高山底事頭先白甚教人錯  
恨五更風花狼藉寒欲退劉義筆深欲歿韋郎膝問  
何如江上孤舟篔簹君不見過門多惡客等閑踏破  
瓊瑤迹便龕豪下馬坐人牀尋歡伯

婆羅門引

重陽與元帥寶子温暨眾友東城

賞菊即席賦

浮空霽色江涵秋影鴈初飛相逢共遶東籬點檢樽  
前見在人似曉星稀對滿山紅樹葉葉堪題大家露  
頂任短髮被風吹只恐黃花人貌不似年時盃添野  
水更何用頻頻望白衣沉醉後攜手方歸

清平樂

壬申歲六月十四日

滿斟綠醕勸我千金壽不住光陰催老醜三十七年  
回首鏡中白髮無多缺壺安用長歌有志封侯萬里  
列仙不柰臞何

又 錦堂壽

青雲得路休嘆功名誤好在輞川堪畫處聞早抽身  
歸去任他千丈風波光陰著酒消磨識破落花浮世  
笑看金狄摩挲本作抄

又

閏重九宋翔卿席

黃花今後纔是秋光暮依舊滿城風又雨勾引錦囊  
詩句東籬尚可重遊羨君來往風流莫惜樽前健倒  
這回節去蜂愁

又

戲贈

城南歸路信馬隨車去家在白雲樓下住簾幙深沉  
庭戶不論天上人間到頭此債須還一枕行雲夢覺  
小樓却似巫山

南鄉子 李克紹生朝

來往亦風流會伴仙翁衣錦遊聞道長平朱紫地西樓依舊人人說故侯能得幾春秋未必靈椿老便休自有枝枝丹桂在何憂寶月忙催玉斧修

又 上夫人壽日

香靄博山鑪羅綺森森奉燕居晝錦歸來冠蓋里當時曾拜金花大國書一旦得雙珠阿大中郎喜有餘見說上天雖富貴爭如平地仙家碧玉壺

又 錦堂壽日

弓劍不離身唾手功名馬上成見說人生為郡樂班春政事如棋局局新熊夢慶佳辰喜動山城擊壤民晝錦堂前爭獻壽留賓盡是蟠桃會上人

又 錦堂碧落壽席

爽氣逼人寒相對溪堂雪後山賴有忘年林下友盤桓都把功名付等閑盡道好休官况在黃柑紫蠟間天意不隨人事改平安愁莫能侵鏡裏顏

太常引 同知崔仲明生日

太行千里政聲揚問何處是黃堂遺愛幾時忘試聽取人歌召棠錦衣年少插花躍馬休負好風光三萬六千場但暮暮朝朝醉鄉

又 竇君瑞壽日

燕山勲烈有餘光  
問丹桂幾枝芳  
陰德後來昌  
但教子應須義  
方功名看破黃冠野服  
林下道家裝  
何處是仙鄉  
這日月閑中最長

又 劉君祥壽二月十五日

區區州縣肯徒勞  
誰得似卯金刀  
一笑醉蟠桃  
問何處  
仙山可巢兩朝人物  
積年陰德心力過  
蕭曹門戶便須高  
看今後君家鳳毛

西江月 壽堂壽

落落瓊林人物飄飄鶴  
警仙風渡江已後見英雄  
那在懸刀一夢霧  
恰山中隱豹雲還天上從龍  
太行直枕大河東  
猶比聲名不重

又 表節使壽字懷誠

薦疏李誇精鑿 垣 堦佳章得賢侯 寬 手如霹靂在同  
州 瑣之 不讓當時談藪 顧 但可稱為勁草 諶 莫教指  
作清流 樞 歸來綠野任沉浮 度 這箇家風耐久 炎

又 張堂臣壽日

人比當年楊柳六郎元似蓮花  
漁經獵史是生涯  
那羨章臺走馬鱸膾未歸風  
駕斗牛尚客星槎直教三  
戰過崔家伴取赤松林下



又 答亞之

漠漠煙生碧樹溶溶水滿芳溪東風吹溼落花泥忙  
殺營巢燕子百字詩慙我寄一壺酒望君攜休將閑  
事等閑題且把眉頭放起

鵲橋仙 段侯壽日

題橋志氣沉碑勲業不在著鞭人後浮雲富貴轉頭  
空似一夢南柯太守輞川別墅平泉小隱此計地長  
天久金章還肯換簑衣買陂塘旋栽楊柳

又 劉君祥壽癸卯二月十五日

歲方值卯斗方指卯卯月月圓時候大家來把卯時  
盃共與箇卯金為壽一盃壽酒一盃貴酒更有一盃  
富酒一盃留得賀添丁見積善之家有後

點絳脣 重陽菊間小酌同申元帥等

秋樹風高可憐憔悴門前柳白衣去後閑却持盃手  
一笑相逢落帽年時友君知否南山如舊人比黃花  
瘦

又 錦堂壽日

馬上功名射鵬誰似將軍手一朝肘後金印懸如斗  
錦繡山川何似人長久閑中友為君添壽共勸念懷  
酒

又 王懷州壽日戊戌十月一日

橫稍將軍是他馬上男兒事河山表裏養就英雄氣  
衣錦歸來占盡人間貴功名遂神仙平地學取留侯  
計

又 馮巨川南齋牡丹

花恨開遲為花遲後為花惱問花開了却恨花開早  
人貌年年不似花長好還知道年年人貌却笑花先

老

酒贈車元帥

著甚乾忙人生只合糟上老一盃軟飽從事齊能到  
不讀離騷恐怕愁難掃春光好醉時便倒何處無芳

草

鷓鴣天 弔李克修

須信人生足別離此情惟有落花知方憂躍馬明年  
事年四十二已 忽至黃楊厄閏期 乙未七月二十六  
日閏前 生有限去何疑騎鯨公子賦成時得從上界  
真官府百計招魂不肯歸

又 和天久雨

滴滴寒聲攪夜眠行雲似與楚山連百川到底終歸  
海一水元來不護田

卷亂來來少睡眠  
 榻又留連那堪又下瀟瀟  
 雨可柰無秋薄薄田  
 殘年眼前戈戟尙森  
 然得他真箇風雲手不信人間有漏天

莊靖先生遺集卷之七終

莊靖先生遺集卷之八

序

無名老人天游集序

元陽子一日攜無名老人天游集見囑曰守一自簪  
 冠以來出入立門中皆老人引度也不敢忘其德今  
 將平日遺稿命工刊行使傳於後庶不負平昔諄諄  
 之意願題其端且爲老人光華老人姓陶農家子平  
 水襄陵人父珍母賈氏初母夢青童金盤中獻一大  
 果如瓜半黃半紅言上仙賜汝無名果也因而娠十  
 三月而生皇統壬戌十一月十三日也性沉靜寡欲

舉動與羣兒異正隆年間全家避役陝州靈寶縣時  
年方壯有勇力喜談道雖不讀書便解義補縣弓箭  
手縣令許子靜與語奇之時贈以詩不以常人待也  
大定壬辰八月十三日隨丹陽馬祖師過關服勤三  
年祖師曰此非干汝修行事汝自修行去於是浩然  
長往隨方乞化與苦志趙公爲侶每歸二人背坐相  
倚不言不笑人莫能測凡七年忽覺體中屈者伸室  
者通神與氣非故吾也遊戲人世三十餘年行步如  
風一日讀太上西昇經豁然有省謂同行曰我今還  
鄉去也年前有韶州岳家松王氏請住庵我已許諾  
不可食言已而王氏果至迎歸所指處到庵索湯沐  
沐畢振衣入靜位留辭世頌儼然而逝春秋八十有  
六葬於永寧縣西時正大丁亥三月初七日也無名  
之號以其夢歟集中詩頌一百八十三長短句九十  
一信手拈得如萬斛泉源不擇地而出皆仙家日用  
事也七言有造化遠離生死外機關超過有無中古  
木開花春寂寂寒潭浸月夜澄澄但言造化都歸妄  
畢竟陰陽總屬私千里暮霞烹絳雪半林明月搗玄  
霜汞死鉛乾天地靜龍吟虎嘯鬼神藏有作有爲俱  
妄想無名無字是真常願君早悟玄中趣學我優游

物外修五言有對客談黃卷呼童烹紫芝性似山猿  
獨心如野鶴孤頤神春寂寂調息夜綿綿俯仰長春  
景遨遊不夜鄉若此等句頭頭見道無一字閑非煙  
火食人所能道也中間舛錯講師禪定之校正觀者  
無憾焉辛丑年七月望日序

大方集序

爭然子者濟南人姓郎名志清幼而穎悟舉止作高  
尚事年十二灑落有塵外想求出家父母肯之十四  
遇一道者見而奇之曰是兒有仙分安得在此語以  
真理釋然有所得自後稍加精進一日忽見重陽真  
人繪像駭然曰此乃前者所遇之師也冥契相投豈  
偶然哉於是絕嗜慾屏紛華刻意於道學弱冠僑居  
澶淵三十一還濟上主者諉以玉霄觀圓容大師拂  
然不受遂之益都從者雲集師不悅乃渡河逃名於  
南陽山中去圭角混光塵舍者與之爭席矣逍遙雲  
水閒其對景述懷託物見情片言隻字沾丐者多簡  
而古峻而潔邃而深無一點俗氣蓋立門之星斗歟  
庚寅歲冬復歸澶淵返寂於通真觀年五十一師所  
畜馬哀鳴廐下弟子劉志源見而嘆曰師已仙矣尙  
留何爲不如淮南之鷄犬乎言訖乃仰而呼俛而默

三首九十三  
眼光落地不復芻豆矣聞者異之葬於先師靈兆之側襄事後志源等鳩集生前遺稿刊之於木元陽子紇石烈守一索余序之前後作者贊述詳矣言之則贅姑道其大畧云辛丑歲七月朔日序

錦堂賦詩序

士大夫詠情性寫物狀不託之詩則託之畫故詩中有畫畫中有詩得之心應之口可以奪造化寓高興也侯之別墅葺一室曰錦堂時時班春往來於此合親友而燕之因命畫史以春水夏雲秋月冬松繪之於壁蓋取陶靖節之句也四時之景叢於目前滌煩慮暢幽懷超然與造物者游坐上之興溢矣侯乃語客曰今夕之賓樂乎但恨對景無言敢請逐題而賦之客曰古人之詩今人之畫二者盡矣言之則贅然景與時遇人與景會不嫌冷淡可停杯而待侯乃口占而首唱之時壬寅十一月望日序

傳

孟氏家傳 孟駕之

高祖唐牧字堯臣雲中人也幼業儒術擢進士第仕遼爲太子洗馬牛令公見而異之以女妻焉生子彥甫字仲山金運革命廕補品子後以明法中選知西

北路招討司事時有疑獄獄成當棄市公拒不受命雖怒而迫之莫能奪也後三日得實免死者百餘人招討公執手而謂之曰子之陰德如此其能無報乎可勉之徙宣德州司候登州軍事判官享年八十而終二子曰龜曰鶴龜早世鶴字壽父幼聰敏好學手不釋卷同進士第出身主汾州西河簿宰宣寧縣進階儒林郎致仕六子曰仁曰義曰禮曰智曰信曰楫女曰蕤曰賓太師張公之甥也仁更名澤民字安宅性敦厚博雅不喜檢局與人交豁如也事王父母孝居器過哀友愛同氣鄉黨稱焉父公母病與妻張氏奉侍溫清頃刻不離命醫視藥必親嘗之以人肉治羸割左臂肉雜羹中而進之母自是善飲食勿藥孝感然也郡守知之欲聞於朝廷母恐孝子之傷生力勸止之年逾三十不就資廕折節讀書母罄囊金聚經史以成其志工屬文頗爲進取計有聲於場屋學者從之如林崇慶元年秋魁大同府選辛巳登進士第調河南福昌簿以廉能稱中外交辟不就世亂避地於陸渾南山以詩酒自適號雲巖老人有著述聞於世壬辰秋九月一日卒於槐林平伊陽令周文炳察判盧某備禮權厝焉累官朝列大夫妻清河縣君

二子曰琦曰璘女月娥歸白登郭文振琦字伯玉游學齊魯聞貞祐之亂莫知所從璘易名攀鱗字駕之因夢故也自束髮從父訓不經他師指授十三薦名於京師庚寅擢進士第任陝州州判辟舉靈臺令入補省掾壬辰京師失守隨回軍渡北僑居河津癸巳抵平陽行臺胡公異禮待之每事諮議焉內省委管句印造經籍事已亥朝廷以近來文風不振分三科諸路選試精業儒人監試劉中以瞻於才學皆優其等充本府議事官權宜之職也妻韓氏濮王之後繼母韓氏之姪女也二子曰史噲曰桂哥皆幼孟氏姬姓魯公族孟孫之後保姓受氏於今不絕其間賁之勇舍之約軻之儒光映百世凜然如生裔孫攀鱗駕之亾其世系自高祖而下得其傳焉又懼其湮沒以前後事略託所友而記之意者欲文之碑而誌於墓歟或錄其實於太史世其家歟狀其行於太常議其諡歟將施於蒸彝鼎如古之所謂銘者自成其名歟審如是其志遠且大矣其自敘者備矣尙何言哉然有美而不聞於世友之過也故不敢不書以俟來者

譜

李氏家譜



按大唐天潢玉牒顓帝之後生大業大業生媯媯娶有喬氏之女感月光貫昴而生咎繇咎繇生伯翳伯翳之後世為士師至里成避桀之亂避居伊侯之墟食李實乃改為李氏此言咎繇之後以理獄為功遂姓理氏其後子孫或改里氏至伊侯之墟避難遂改里為李也成生利正當商湯之時利正生昌祖昌祖仕陳為大夫因居苦縣昌祖生明明為陳相葬瀨鄉之北立廟因有相城明生慶賓慶賓生靈飛一名虔會所言陳國乃古之陳國非周時所封胡公滿之國也自李成至虔會五世相承年代相類當此之時太皞之後已為陳國及周封舜後當是此陳既滅乃封胡公而王其地也靈飛之妻真妙玉女感日精之夢而生老君此一說也又按本記云老君生而能言指李木曰此我姓也隋內史舍人薛道衡老君祠庭碑云感日載誕莫測受氣之由指李為姓未詳吹律之本是也又樓觀先師傳云老君因聖母攀李木而生謂曰此汝姓也三家之說經傳備載今並明之以彰聖人之宗緒矣至紂王時居岐山之陽西伯命為守藏史武王克商召為柱下史其子名宗仕魏為將軍有功封於段干宗之子注注之子宫宮之遠孫假假

仕漢孝文帝假之子解解爲膠西王邛太傅因家於齊風俗通云李伯陽之後出隴西趙郡頓丘渤海中山襄城江夏梓童范陽廣漢梁國南陽十二望唐高祖淵二十二子其韓王元嘉守澤州武氏盜國宗室潛謀恢復事露皆被害妃房玄齡女妃亾四子於碧落聖佛谷追薦母氏黃公讓善篆磨崖碑存焉其後裔孫因家於澤或隱或仕宋初李植字彥材熙甯間中武舉科隨范文正公西征官至右侍禁墓誌云葬於澤州晉城縣五門鄉從先塋也三子持構授高祖李憲之忌其所出生曾祖猷猷生祖行可行可二子長之邵次之才之邵一子曰楫楫子六人長儀應進士舉恩勝二子亾有女在北弟馬興男閏郎在餘亾之才三子長植次構次俊民用章植三子曰挺曰攜曰振挺男世英渭南馬鋪監沒於王事攜謙甫進士第乙科孟津機察男世寧監福昌酒構洛陽茹店商酒監男鐵塊女蓬仙在北俊民男揚伊闕商酒監揚一子道兒甲戌兵火值甲午二十餘年間皆物故矣獨閏郎在楫之孫也二子皆幼爲李氏之肩癸卯年四月初一日丁未譜

記

睡鶴記

人之情有所甚好有所甚好而不得則必見似之者而喜非徒好之蓋感而有所得焉濠梁之魚得之樂山陰之鷺得之書支道林之鷹與馬得之神俊不有所得夫何好焉鶴鳴之好鶴亦猶是也鶴也者物之生於天而異者也其性潔而介其聲亮而清潔而介則寡所合亮而清則寡所和獨以孤高自處飛鳴於霄漢之上豈求其異也哉蓋天之所賦者異也夫才高則無親勢孤則失衆鶴奚恤焉若或矯情自免下同於頻頻之黨變常而器其真非鶴之德也非鶴鳴之所好也叔世道衰天物暴天思其所好而不得逮丙申歲於新居之側有蹲石曰睡鶴昔人取其似而名之鶴鳴見其似而喜之事與心會豈偶然哉三復觀之其骨聳而奇其背瘠而僂其頸宛其喙箝若無意飛鳴者雖沉潛靜默有飄然物外之想疑其孤高之過爲衆所棄而自晦歟抑衛人之軒不足棄歟烏程之樹不足棲歟將遺世遠舉羽化而仙此特其化身歟不然何爲不飛不鳴日游於睡鄉者乎謂其果不能鳴則陳倉之鷄胡爲而鳴耶謂其果不能飛則零陵之燕胡爲而飛耶吁是時也以飛鳴而望於鶴

不可望於石尤不可姑以其似而又有所得故感而爲之記云

劉濟之忍齋記

彭城劉君巨川治別室之西偏訂曰忍齋卜日會諸同志落之鶴鳴怪而問焉劉君曰凡有血氣者皆有爭心在人則尤甚焉人情甚不美小有不協至於按劍相怒沒齒而恨不解是何耶血氣之所役也忍之意非敢望於人蓋將以自警耳孔子語門弟子曰小不忍則亂大謀成王命君陳亦曰必有忍其乃有濟聖賢以忍之一字諄諄而告人者於血氣方剛之時而戒之也昔之人有能之者如張公藝之忍於家朱將軍之忍於敵耳餘爲功名而忍王謝爲性命而忍元載以鼎餗之譏忍於笑翁思以狗曲之辱忍於醉師德之忍於唾懷祖之忍於罵是皆不以一忿而動其氣其得聖賢之心乎吾名吾齋亦猶是也鶴鳴喟而嘆曰異哉未有無事而忍者若子之言所以自處者得之恐非所以處人者得之於己失之於人可乎夫情深則怨匿理到則心服與其匿怨孰若服心我以情怒彼以理屈則門外負荆者踵接矣莫不釋然開怡然暢廓然通無一毫芥蒂於胸臆初以自警

卒能警於人過此以往足之所履皆君子之忍齋也獨戚戚於一室之內何其自狹也劉君於是矍然而起拱手而謝曰厚矣子之托吾境也請刊其說於石以廣其傳

歲寒堂記

節婦樂氏澤郡南關宣銳巷樂珩女也幼亾父母依於外族外王父李榮鞠養之年十五適本關劉璋泰和五年乙丑夫亾二十一歲守志長子禎五歲次禮十七日也從吉外氏豪俠欲奪而嫁之堅誓不許苦節自勵事王母舅姑小心敬順盡爲婦之道

黨同焉而不違於禮婉焉而不失其正舅姑以

家嚴恪潔勤躬操井臼無一日而少懈上下畏愛焉主中饋助祭祀怵惕之義表儀宗門值貞祐亂離往往骨肉不收樂氏俯育二子流散他方遑遑涕慕抱終身之戚丙戌復歸寧故里子禎娶東林隱君子母俊卿之孫女生二女長適秦茂才次許嫁本州趙次官姪男餘慶禮娶楊氏生三男一女長健兒定婚樂家社王氏次伴健婚東蜀村李氏次堅童女許嫁下町張氏夫之兄益弟儀偉候仁妹適梁氏偉娶徐氏二男一女長福妻谷下栗氏次祐妻本州王氏女嫁

氏祐二男長丑兒次顯兒中外族姻無不周恤者  
 禎字君祥參謀本州宣差所事巖巖特立篤於孝友  
 念無以報劬勞之德因所友而榜其堂曰歲寒堂冀  
 母氏之名節有光於後噫幼而孤長而寡老而其福  
 厚歷憂患五十餘年始終不易凜凜有松柏之操名  
 其稱矣當是時也不能安其室如七子之母者十常  
 八九有不登是堂而愧者乎癸卯三月辛巳書

繼之以詩

家貧子幼如月魄煩惱林中世途惡荒墳木拱淚不  
 乾野店天寒孤莫託歸來扶杖雪滿梳山頭化石髓  
 望夫萱堂忘憂忘亦得孝哉一雙反哺烏

重修悟真觀記

高平縣南二仙廟者在張莊李門之間唐曰真澤宋  
 曰沖惠沖淑真人為居民祈禱之所無禱不應一方  
 之休戚係焉大金貞祐甲戌歲國家以征賦不給道  
 士李處靜德方納粟於官勅賜二仙廟作悟真觀俾  
 其徒司見真主之額之後有嫌於心為其名位之乖  
 也其意若曰以廟為觀則是無廟矣以觀為廟則是  
 無觀矣不亦誣於神違於人乎惴惴然不安積有日  
 矣於是市廟東之隙地為三清殿為道院蠲庖漏表

壇埒外力所施田以資工役其修齋行道拜章啟立步虛華夏儀鸞而引鳳者於此焉觀之西曰廟棟宇宏麗像容粹穆邃以重門翼之兩廡旁列諸靈之位其時和歲豐民無疾癘歛幽擊鼓婆娑而樂其神者於此焉各事其事互不相雜名與位判然矣識者躋之按禮云凡祭有其廢之莫敢舉也有其舉之莫敢廢也蓋禮所重者祭或舉或廢不可得而私卽廟而觀旣觀而廟是未嘗敢舉亦未嘗敢廢豈私也哉兩得而不兩失神人俱悅無遺恨矣此重修之意也德方請以其事書之於石余用其意而筆之德方陵川八年二十出家明昌三年壬子禮本州神霄宮郭太監爲師泰和丙寅奉祠部牒披戴登壇爲大法師後七年貞祐改元賜紫號達妙充澤州管內威儀偶值器亂晦迹不出大朝丁酉歲遣使馬珍考試天下隨路僧道等共止取一千人德方乃中澤潞二州選第一是歲八月於燕京受戒回請以白鶴王志道知神霄宮事郡長段公從之俾遂其高懷乃於宮西別院爲鶴鳴堂三閒日與方外友彈琴話道焚香煮茗誦周易黃庭老子書究諸家窮理盡性之說與悟真相去五十里時時往來適游衍之興不以傲爲高不以

誕爲異簡而和婉而通行必合於義動不悖於禮其  
肯誣於神違於人慊於心亂名改作者乎

重修浮山女媧廟記

澤之爲郡在太行之頂其四面亂山環列東向望之  
突然而起孤高峻絕不與衆峰相連者曰浮山也山  
之腹有巖穴中有二像廟而祭之傳者以爲翁婆神  
居民之爲嗣續計者往往禱於是焉按圖經翁婆神  
在郡東南二十五里浮山北坡上宋元祐六年建計  
屋八間共二十二椽周圍七十五步又紹聖三年丙

子李旦亦言此廟自元祐六年及觀至和二年郭寶

碑已重修矣圖經所云元祐六年建亦重建也究其  
原莫知所從來或曰女媧廟並無所據按淮南子云  
女媧氏鍊五色石以補蒼天斷鰲足以立四極殺黑  
龍以濟冀州積蘆灰以止淫水蒼天補四極正淫水  
涸冀州平此皆有功烈於民者也民追而祀之其以  
此耶傳者通謂之浮山神大定二十六年郭道珙等  
增舊制而新之蓋五載工始畢值貞祐甲戌兵火復  
毀逮大朝庚子本郡次官趙唐以其男山兒幼亾不  
能忘情因謁是廟慨然有起廢之心遂命耆老張珏  
輩庀工計費又令總領景用與提控許堅督其役斧



斤者瓦甃者版築者不召而從不鳩而集富者輸其財貧者竭其力不日而告成自是公得男女三人又從而起敬焉辛丑歲三月十八日會郡人而落之索余紀其事將刻之石姑以前人所聞而書之噫人而無後爲不孝之大然人生於天地之間果由人乎哉或得之於卜如成季者生而有文在其手曰友或得之於夢如唐叔者生而有文在其手曰虞周之翰皆嵩嶽之神魯之儒乃尼山之秀是山也果能以英靈之氣賦予於人者乎求而得之者有之不求而得者神何與焉天地萬物父母也物莫靈於人天地之委蛻也豈私於人哉夫臧孫達之有後也以德其所求者異於人辛丑年三月十五日記

陽城縣重修聖王廟記

按圖經陽城蓋漢之獲澤縣也屬河東郡今縣西三十里故城是也晉隸平陽郡後魏文成興安二年癸巳自故城移於今治隋屬長平郡唐武德元年於此置澤州玄宗天寶元年改爲陽城縣又云殷湯廟在縣西南七十五里析城山上宋熙寧九年河東路旱委通判王任親詣析城山祈禱卽獲休應十年五月空日牒封析城山神爲誠應侯政和六年三月二十

九日析城山殷湯廟可特賜廣淵之廟爲額誠應侯可特封嘉潤公宣和七年重修廟記云本路漕司給係省錢命官增飾廟像及廣其庭壇高其垣墉列東西二廡齋廚廡庫客次靡不畢備華棖彩桷上下相煥以稱前代帝王之居而致崇極之意以其餘材完嘉潤公祠合二廟凡二百有餘楹大金革命廟止存九間共六十椽大朝壬寅年春因野火所延存者亦廢民間往往卽行宮而祭之本縣行宮在郭內東西街北右去城門五十餘步左距縣衙一里強至大金壬午歷一百二十八年而毀邑人王元武全王昇張義王通王漢等雖在擾攘之際相與鳩工復起正殿三間元帥延陵珍補蓋西廡歲有水旱疾疫禱無不應民之戴商厥惟舊哉噫神依於人廟食百世亦豈有昇沉時耶抑成壞之數幽顯莫能逃耶何天禍未悔如此之酷耶僕重過是邑王元等託友人燕子和求識其始末故書以示之時壬寅十月庚戌朔

重修佛堂記

吳道子畫鄴都宮畏罪者衆韓吏部題木居士求福者多世之人莫不知罪之爲可畏福之爲可求然信賞有所不能勸必罰有所不能懲而觀道子之畫吏

部之題竦然有動於心不待賞而勸不待罰而懲何耶豈正率者難從幻化者易感歟兵興以來俗狃於惡以強陵弱以眾暴寡以勇苦怯怙終自苦當是時也未有不嗜殺人者夫佛教自殺者不復得人身况於他人乎宣差察之鎮是邦也因謁聽事後之佛祠闕其爲風雨所壞遂命工起廢缺者補之污者墁之壁繪像飾爲之一新乃與其妻孫氏時時敬禮倍堅回向益勵齋嚴其見於臨事寬而不苟仁而不虐皆如來慈悲之心下之人亦復歸依見善則樂而爲之見不善則憚而不爲不陵弱不暴寡不苦怯皆如來慈悲之化夫以易感之化易難從之俗亦救時之一助也若夫化流天下使人有士君子之行如周家太平之時其待木鐸之政乎

重建修真觀聖堂記

按圖經修真觀在東門內街南宋大觀戊子陳遷孟新堂之故基也值大金貞祐甲戌兵火而毀煨燼之餘瓦礫堆積二十八年間無一人刮目者女冠張守微與弟德忠因逃難四方俱獲生還欣然有起廢之念乃求訪本觀遺跡道士李君淨歷歷而告之曰此殿堂也此道院也此客舍也此堵而環也此圃而蔬

也此井而飲也既得其詳於是首建聖堂三間爲修敬之地復夷荒壤剷惡草出牆根而築之仍爲後圖是堂也經始於辛丑十月甲子次年三月丙戌工畢始終其事者郡侯段公暨夫人衛氏守微晉城縣高都管樂南中社人幼婦趙氏夫亾正大甲申五月捨俗出家禮太原榆次縣專井村玉真菴洞妙散人楊守玄爲師師乃長春真人門下靈神子所引度者也傳授有源故其信道也篤守志也確肅而莊強而敏新故而潔污蕭爽峻逸雖在城市有林下風異時天上定歸王母之家今日人間獲觀飛瓊之室弟德忠及妻王禮善益加歸向皆生無上道心男留住女梅兒慶仙宜哥滿惜告成之後伏願免離五苦延納百祥中外存心同證妙果壬寅年五月初一日記之堂上以警來者

題登科記後

承安五年庚申四月十二日經義勝興

李俊民字用章年二十五澤州晉城

郭伯英字伯誠年三十潞州上黨

劉從謙字光甫年二十五解州安邑

張孺卿字介甫年二十七大興府左巡院

王知進字崇禮年三十一東平府平陰

孫璵字子玉年二十七大名府夏津

彭悅字子升年二十三真定府錄事司

石抹世勣字景略年二十八咸平酌赤列千戶所

李適字適之年二十九大定府長興

晁李仲字寶臣年四十一通州三河

朱煥字文伯年四十四開封府警巡院

伯德維字公理年四十一中都和魯胡千戶所

趙楠字庭幹年二十四澤州高平

王元字善之年三十三解州司候司

糜元振字彥升年二十八磁州司候司

禱半字子善年四十一解州聞喜

潘希孟字仲明年二十八磁州司候司

孔天昭字天安年三十大興府左巡院

王毅字知剛年二十八大興府左巡院

侯尙字世卿年三十太原府平晉

高應字大中年三十二磁州邯鄲

趙銖字敬之年二十五大興府左巡院

晉蕃字天佐年二十五奉聖州磐山

巖葛希夷字仲傑年三十五婆速路五里甲海下

郝鈞字國器年三十五大名府館陶

鮑元字善長年四十四潞州長子

康鼎字晉卿年二十五博州高唐

閻詠字子秀年三十七兗州磁陽

鄧浩字君猷年二十六平陽府錄事司

宋克俊字英叔年二十七河中府錄事司

趙宇字公定年二十八澤州陵川

劉礪字溪叟年七十四濟南府章丘

杜實才字克彥年四十四南京巡院

余聞承安庚申登科記三十三人革命後歸

與高平趙楠庭幹二人在一日邂逅於鄉邑

哽咽道舊壬寅歲五月初吉庭幹復挈家之

燕京感慨忍淚書五十六字寄之試將小錄

問同年風采依稀墮目前三十一人今鬼錄

與君雖在各華顛君還攜幼去燕然我向荒

山學種田千里暮鴻行斷處碧雲容易作愁

天癸卯春

大陽資聖寺記

晉城縣漢之高都縣也屬上黨郡晉因之後魏改屬  
建興郡明帝移建興於高都城孝莊帝復改建興郡

爲高都郡縣屬焉北齊置長平高都二郡後周又以長平安平二郡併入爲高都郡隋開皇初郡廢爲澤州十八年改高都縣爲丹川縣因縣北丹水爲名屬長平郡唐武德元年移於源漳水北三年析丹川於古高都城置晉城縣屬建州六年州廢縣屬蓋州六年省丹川縣蓋州入晉城貞觀元年蓋州廢爲澤州縣亦屬焉宋及大金因之不改本縣境內寺院二十一區大金貞祐甲戌至甲午存者十之三四資聖寺在縣北四十里大陽社北齊文宣天保四年癸酉梁

元帝承聖二年也號永建寺至武成河清二年癸未

建石塔二級後唐明宗長興四年癸巳立尊勝幢宋真宗天禧四年庚申改賜資聖寺周圍二百六十三步屋宇二十八間共一百二十椽與碧落治平院澤州浴室院皆法眷也本寺素乏常住且過者稀貞祐兵火後居民蕩析鄉井荆棘寺幾於廢里人王簡等亦流落四方艱苦萬狀默有所禱異日平安到家當捨所有以荅佛力旣歸乃以所居之正堂五間與本寺修香積位其殿宇寮舍缺者完之弊者新之靡不用心焉且語耆老曰本社宋阿李生前爲無後將本戶下地土一頃五十餘畝施與本寺充常住見今荒

閑有無借眾力開耕給贍本寺爲修飾潤色之費仍與住持僧添鉢不負我輩報恩之願眾忻然諾之命本寺僧行廣主其事行廣俗姓李本社人純慤謹愿可託故令專之自齊文宣天保四年至今癸卯七百五十一年其間升沉興廢者屢矣虐焰之酷未有甚於此時者賴有其人家風不墜不幸中之幸者也劉巨川濟之欲傳於久遠求碑以實之故書癸卯年四月初六日壬子記

澤州圖記

禹貢冀州厥土惟白壤厥賦惟上上錯厥田惟中中九州之中爲第五周禮職方氏掌天下之地圖河內曰冀州漢地理志曰河東河內得魏地觜觿參之分野其地帝堯夏禹所都之域詩唐國風此晉也而謂之唐本其風俗憂深思遠儉而用禮乃有堯之遺風焉三晉屬韓周赧王五十三年秦武安君白起伐韓拔野王上黨路絕上黨守馮亭以上黨歸趙趙使平原君受地五十五年秦攻上黨拔之上黨民走趙趙軍於長平以按據上黨民秦因伐趙四十萬人降白起秦并兼四海分天下爲郡縣漢興因之先王之迹旣遠地名又多隨時改易不同漢地理志河東郡秦



置濩澤端氏二縣隸焉上黨郡秦置高都洺氏二縣隸焉河內郡高帝元年爲殷國二年更名沁水隸焉按澤州圖經屬禹貢冀州之域後魏置建興長平安平三郡明帝移建興郡於高都城孝莊帝復改建興郡爲高都郡後周又以長平安平二郡併入改爲高平郡隋初廢郡爲澤州按晉城圖經本漢高都縣也屬上黨郡晉因之後魏改屬建興郡至孝莊帝改屬高都郡北齊置長平高都二郡後周併爲高平郡隋開皇初郡廢十八年改丹川縣因縣北丹水爲名屬長平郡唐武德初移於源漳水北三年析丹川於古高都城置晉城縣屬建州六年州廢縣屬蓋州是年省丹川縣蓋州入晉城貞觀元年州廢屬澤州按陽城縣本漢濩澤縣屬河東郡今縣西三十里故城是也晉屬平陽郡後魏興安二年自故城移於今後隋屬長平郡唐武德元年於此置澤州八年移州端氏縣天寶元年改爲陽城縣按端氏本漢縣屬河東郡史記趙成侯十六年與韓魏分晉封晉君以端氏今縣是其地也其故城在縣西北三十里卽漢治也晉屬平陽郡後魏置安平郡縣隸焉真君七年省太和八年復置隋開皇三年郡廢十八年自故縣移於今

治屬長平郡唐武德八年移澤州於此治貞觀元年  
又徙州治晉城按高平縣漢涇氏縣屬上黨郡後魏  
於古高平城置唐志云漢涇氏縣地因以名之屬長  
平郡隋因之又併涇氏入焉唐武德初於縣置蓋州  
貞觀初州廢按陵川縣在漢屬涇氏縣地隋開皇十  
六年以戶口滋息山川修阻遂割長平郡二縣戶析  
置爲中縣至唐武德元年改長平郡爲蓋州縣亦屬  
焉六年移蓋州於晉城縣貞觀元年改蓋州爲澤州  
縣屬澤州按沁水縣漢縣屬河內郡晉因之元魏爲  
永安縣後於此置廣寧郡後齊郡廢改縣曰永安隋

開皇十八年復改爲沁水縣屬長平郡唐屬澤州五  
代後因而不改皇統三年程先生左輔國碑云澤之  
爲州蓋以境內有濩澤名焉州之治晉城蓋以其地  
故晉封名焉夫晉者堯所居之墟舜所耕耘之地二  
帝遺風至今猶存自開皇三年爲州迄今五百六十  
一載蓋開皇三年癸卯至皇統三年癸亥也宋張商  
英題桃固嶺云大舜耕耘地斯民聚落居昔人皆以  
舜澤名之舜耕于歷山鄭立曰在河東漁于雷澤鄭  
立曰雷夏兗州澤今屬濟陰圖經引墨子云舜漁于  
濩澤墨子本云漁于雷澤不同舜澤取舜耕處名之

也歷山河東之境近之必有辯者州四至東至衛州界二百里以孤松樹爲界自界至衛州一百六十里西至絳州界一百九十里以烏嶺堠爲界自界至絳州一百四十五里南至懷州界四十五里以土堠爲界自界至懷州六十五里北至潞州界一百里以山口村爲界自界至潞州六十五里東南至懷州界七十五里以枯冢爲界自界至懷州六十里西南至孟州界六十里分水嶺爲界自界至孟州一百二十里東北至相州界二百里以城嶺爲界自界至相州一百六十里西北至晉州界一百六十里以長城嶺爲界自界至晉州一百七十里至南京四百六十一里河南府二百二十五里係大定年前里堠也隋開皇三年至天興甲午六百五十二年歷唐五代宋金易十二姓或興或廢有如傳舍金國自大安之變胡騎入中原北風所向無不摧滅者貞祐甲戌二月初一日丙申郡城失守虐焰燎空雉堞毀圮室廬埽地甫井成墟千里蕭條闕其無人後二十年大兵渡河甲午正月初十日己酉蔡州城陷金運遂絕大朝始張官署吏乙未遣使詣諸路料民本州司縣共得九百七十三戶司候司六十八戶晉城二百五十五高平

二百九十陵州六十五陽城一百四十八端氏一百一十七沁水三十至壬寅續括漏籍通前實在一千八百一十三戶以鄉觀鄉以國觀國以天下觀天下其可知也噫生斯世者何不幸邪百六之數莫能逃邪死者已矣生者倒懸何時而已邪上天之禍如此其酷尙未悔邪泣然記之庶幾父母瘡痍之民者生休惕之心

